

Službeni glasnik BiH, broj 20/08

Na osnovu članova 12. i 25. Zakona o Memorijalnom centru Srebrenica - Potočari, Spomen - obilježje i mezarje za žrtve genocida iz 1995. godine, ("Službeni glasnik BiH", br. 49/07), Upravni odbor Memorijalnog centra Srebrenica - Potočari, Spomen-obilježje i mezarje za žrtve genocida iz 1995. godine, na sjednici održanoj dana 20. septembra 2007. godine, donio je

STATUT

MEMORIJALNOG CENTRA SREBRENICA-POTOČARI, SPOMEN-OBILJEŽJE I MEZARJE ZA ŽRTVE GENOCIDA IZ 1995. GODINE

I. OPĆE ODREDBE

Član 1.

1) Memorijalni centar Srebrenica-Potočari, Spomen-obilježje i mezarje za žrtve genocida iz 1995. godine osnovan je Odlukom Visokog predstavnika u Bosni i Hercegovini, br. 53/07, od 25.6.2007., kojom je donesen Zakon o Memorijalnom centru Srebrenica-Potočari, Spomen-obilježje i mezarje za žrtve genocida iz 1995. godine ("Službeni glasnik BiH", br. 49/07).

2) Memorijalni centar Srebrenica-Potočari, Spomen-obilježje i mezarje za žrtve genocida iz 1995. godine osnovan je s ciljem izgradnje i održavanja Memorijalnog centra, ukopa identificiranih žrtava genocida počinjenog u Srebrenici 1995. godine i obilježavanja mjesta ukopa, prijema i isplate sredstava za Memorijalni centar; saradnje sa sličnim centrima, fondacijama i udruženjima širom svijeta, prijema posjetilaca radi podsjećanja na počinjeni genocid, obavljanja ostalih aktivnosti značajnih za Memorijalni centar.

Član 2.

Memorijalni centar Srebrenica-Potočari, Spomen-obilježje i mezarje za žrtve genocida iz 1995. godine je pravni sljednik Fondacije Srebrenica - Potočari, Spomen-obilježje i mezarje (u daljnjem tekstu: Fondacija), ustanovljene Odlukom Visokog predstavnika, br. 102/01, od 10. 5. 2001., i upisane u Registar fondacija od javnog interesa, rješenjem Ministarstva civilnih poslova i komunikacija BiH, broj 01/6 -166-1-MP/02, od 11.12. 2002.

Član 3.

(1) **Upravni odbor** Memorijalnog centra Srebrenica-Potočari, Spomen-obilježje i mezarje za žrtve genocida iz 1995. godine (u daljnjem tekstu: Upravni odbor Memorijalnog centra) je tijelo sastavljeno od sedam članova koje upravlja Memorijalnim centrom.

(2) **Savjetodavna radna** grupa Memorijalnog centra Srebrenica-Potočari, Spomen-obilježje i mezarje za žrtve genocida iz 1995. godine (u daljnjem tekstu: Savjetodavna grupa) je tijelo koje čini najviše devet članova predstavnika udruženja porodica žrtava genocida počinjenog u Srebrenici 1995. godine, predstavnici Islamske zajednice Bosne i Hercegovine i predstavnici izvršne vlasti Općine Srebrenica, koje pomaže radu Upravnog odbora.

(3) **Služba** Memorijalnog centra Srebrenica-Potočari, Spomen-obilježje i mezarje za žrtve genocida iz 1995. godine (u daljnjem tekstu: Služba) je izvršni, odnosno operativni organ Memorijalnog centra, koja je za svoj rad odgovorna Upravnom odboru.

Član 4.

Statutom Memorijalnog centra Srebrenica-Potočari, Spomen-obilježje i mezarje za žrtve genocida iz 1995. godine (u daljnjem tekstu: Statut) uređuju se:

- a) status, naziv, sjedište i nadležnosti Memorijalnog centra;
- b) pečat, štambilj, simboli, pravni položaj, zastupanje i predstavljanje Memorijalnog centra;
- c) unutrašnje uređenje i upravljanje Memorijalnim centrom;
- d) imovina i finansiranje Memorijalnog centra;
- e) opći akti Memorijalnog centra;
- f) postupak izmjena i dopuna Statuta;
- g) druga pitanja značajna za rad Memorijalnog centra.

II. NAZIV, SJEDIŠTE I REGISTRACIJA MEMORIJALNOG CENTRA

Član 5.

1) Naziv Memorijalnog centra je "Memorijalni centar Srebrenica-Potočari, Spomen-obilježje i mezarje za žrtve genocida iz 1995. godine" (u daljnjem tekstu: Memorijalni centar).

2) Sjedište Memorijalnog centra je u Srebrenici - Potočarima, Potočari bb, u prostorijama Memorijalnog centra.

Član 6.

Memorijalni centar je pravno lice i registrira se u skladu s članom 4. Zakona o Memorijalnom centru Srebrenica - Potočari, Spomen-obilježje i mezarje za žrtve genocida iz 1995. godine.

Član 7.

(1) Memorijalni centar ima dva pečata okruglog oblika, prečnika 50 mm i 30 mm, u čijem središtu je grb Bosne i Hercegovine uokviren ispisanim tekstom: Bosna i Hercegovina, Memorijalni centar Srebrenica-Potočari, Spomen-obilježje i mezarje za žrtve genocida iz 1995. godine, Srebrenica (napisan latiničnim i ćiriličnim pismom).

(2) Memorijalni centar u pravnom prometu i poslovanju koristi pečate prečnika 50 mm, dok se pečat prečnika 30 mm koristi za ovjeru finansijske i druge dokumentacije.

Član 8.

(1) Memorijalni centar ima i štambilj koji služi za interno kancelarijsko poslovanje.

(2) Štambilj je četvrtastog oblika dimenzija 70 x 50 mm i podijeljen je na dva dijela.

Unutar prvog dijela štambilja veličine 30 mm, latinicom i ćirilicom, napisano je: Bosna i Hercegovina, Memorijalni centar Srebrenica-Potočari, Spomen-obilježje i mezarje za žrtve genocida iz 1995. godine, Srebrenica.

(3) Donji dio štambilja podijeljen je u tri jednake vodoravne kolone, a donje dvije kolone podijeljene su na četiri jednaka dijela u kojima je latinicom i ćirilicom napisano: Org. jed; Broj; Prilog; Vrijednost.

Član 9.

Način upotrebe, čuvanje i zaštita pečata i štambilja Memorijalnog centra utvrđuju se posebnim aktom koji donosi Upravni odbor Memorijalnog centra.

Član 10.

Upravni odbor Memorijalnog centra može odlukom usvojiti simbole Memorijalnog centra.

Član 11.

Predsjedavajući Upravnog odbora Memorijalnog centra zastupa i predstavlja Memorijalni centar u svim pravnim i javnim odnosima.

III. DJELOKRUG RADA MEMORIJALNOG CENTRA

Član 12.

U okviru mandata i ciljeva, koji su utvrđeni Zakonom o Memorijalnom centru Srebrenica-Potočari, Spomen-obilježje i mezarje za žrtve genocida iz 1995. godine, djelokrug Memorijalnog centra je:

- a) izrada projekata i izgradnja Memorijalnog centra;
- b) ukop identificiranih posmrtnih ostataka žrtava genocida i obilježavanje mjesta ukopa;
- c) vođenje evidencija o ukopanim žrtavama;
- d) održavanje Memorijalnog centra;
- e) organiziranje prijema i vršenje isplata sredstava za Memorijalni centar;
- f) saradnja sa sličnim centrima, fondacijama i udruženjima širom svijeta;
- g) organiziranje okruglih stolova, seminara i stručnih radionica, i drugih sadržaja edukativnog karaktera radi promoviranja istine o genocidu;
- h) iznajmljivanje prostora za prigodne kulturne događaje koji su u funkciji sjećanja na žrtve i stradale u genocidu;
- i) primanje organiziranih posjeta Memorijalnom centru i prezentacija sadržaja u Memorijalnom centru;
- j) štampanje i izdavanje promotivnih materijala, brošura, razglednica, letaka, izrada suvenira i slično;
- k) obavljanje i ostalih aktivnosti značajnih za rad i promociju vrijednosti Memorijalnog centra.

IV. IMOVINA I FINANSIRANJE

Član 13.

- 1) Memorijalni centar je vlasnik sve pokretne i nepokretne imovine koja je ranije pripadala Fondaciji.

2) Nepokretna imovina sastoji se od uređenog i ograđenog zemljišta u Srebrenici - Potočarima, kao i objekata i instalacija izgrađenih na tom zemljištu.

3) Pokretna imovina sastoji se od novčanih sredstava na bankovnim računima i osnovnih sredstava i sitnog inventara koji su upisani u popisnim listama.

4) Imovinom Memorijalnog centra postaju i sva materijalna sredstva i prava koje Memorijalni centar stekne i izgradi.

Član 14.

Imovina koja je vlasništvo Memorijalnog centra ne može biti opterećena hipotekom kao sredstvo osiguranja kredita ili biti pod drugim vrstama opterećenja.

Član 15.

(1) Memorijalni centar ima status budžetskog korisnika i finansira se u skladu s odredbama člana 22. Zakona o Memorijalnom centru Srebrenica-Potočari, Spomen-obilježje i mezarje za žrtve genocida iz 1995. godine.

(2) Memorijalni centar ima vlastiti budžet.

Član 16.

Godišnji program rada i finansijski plan Memorijalnog centra donosi Upravni odbor Memorijalnog centra, na prijedlog direktora Službe, do kraja tekuće godine za narednu godinu.

V. UPRAVLJANJE I RUKOVOĐENJE

Član 17.

(1) Memorijalnim centrom upravlja država Bosna i Hercegovina putem Upravnog odbora Memorijalnog centra.

(2) Upravni odbor Memorijalnog centra odgovoran je Vijeću ministara BiH za zakonit i efikasan rad Memorijalnog centra.

(3) Članove Upravnog odbora Memorijalnog centra imenuje Vijeće ministara BiH na mandat od četiri godine.

(4) Članovi Upravnog odbora Memorijalnog centra biraju između sebe predsjedavajućeg i zamjenika predsjedavajućeg, na svojoj konstituirajućoj sjednici.

Član 18.

Upravni odbor Memorijalnog centra ima sljedeće nadležnosti:

- a) donosi Statut i druge podzakonske akte Memorijalnog centra;
- b) imenuje i razrješava direktora Službe;
- c) utvrđuje godišnji program rada i usvaja izvještaj o radu Memorijalnog centra;
- d) donosi finansijske planove i usvaja godišnji obračun;
- e) donosi pravilnike Službe;
- f) usmjerava, vrši kontrolu i daje smjernice rada direktoru Službe;
- g) podnosi izvještaje Vijeću ministara BiH i Parlamentarnoj skupštini BiH, najmanje jednom godišnje;
- h) odlučuje o načinu korištenja izvanbudžetskih sredstava;
- i) odlučuje o materijalno - finansijskom ulaganju u objekte i opremu, a u skladu s finansijskim planom i programom rada Memorijalnog centra;
- j) odlučuje o prigovoru zaposlenih na odluke direktora Službe o pravima zaposlenih iz radnog odnosa;
- k) obavlja i druge poslove saglasno zakonu i ovom statutu.

Član 19.

(1) Upravni odbor Memorijalnog centra donosi odluke većinom glasova od ukupnog broja svojih članova.

(2) Većina članova Upravnog odbora Memorijalnog centra čini kvorum.

(3) Način rada, pravila postupanja, kao i druga pitanja značajna za rad i održavanje sjednica Upravnog odbora Memorijalnog centra bliže se uređuju Poslovnikom o radu Upravnog odbora Memorijalnog centra.

Član 20.

(1) Upravni odbor Memorijalnog centra izvršava svoje zadatke na sjednicama koje se sazivaju po potrebi, a najmanje jednom mjesečno.

(2) Upravni odbor Memorijalnog centra može pozivati članove Savjetodavne grupe, posmatrača, kao i druga lica, koja svojim znanjem i stručnošću mogu dati značajan doprinos radu Memorijalnog centra, da prisustvuju njegovim sjednicama.

(3) Lica pozvana da prisustvuju sjednicama Upravnog odbora Memorijalnog centra mogu davati prijedloge te iznositi zapažanja, ali nemaju pravo glasa prilikom donošenja odluka.

Član 21.

Član Upravnog odbora Memorijalnog centra može podnijeti ostavku, koja mora biti pismeno obrazložena.

Član 22.

(1) Predsjedavajući Upravnog odbora Memorijalnog centra saziva sjednice, predlaže njihov dnevni red, predsjedava sjednicama i potpisuje odluke i druge akte Upravnog odbora Memorijalnog centra.

(2) U slučaju spriječenosti, odnosno opravdanog odsustva predsjedavajućeg Upravnog odbora Memorijalnog centra zamjenjuje zamjenik predsjedavajućeg Upravnog odbora Memorijalnog centra.

Član 23.

(1) Članovi Upravnog odbora Memorijalnog centra nemaju pravo na naknadu za rad u Upravnom odboru Memorijalnog centra, osim prava na naknadu dnevnica, ishrane i troškova prijevoza, u vrijeme kada su angažirani na obavljanju poslova Memorijalnog centra.

(2) Prava članova Upravnog odbora Memorijalnog centra bit će detaljnije uređena posebnom odlukom Upravnog odbora Memorijalnog centra.

Član 24.

(1) Upravni odbor Memorijalnog centra imenuje Savjetodavnu grupu na mandat od četiri godine.

Savjetodavnu radnu grupu čini najviše devet članova.

(2) U Savjetodavnu grupu imenuju se predstavnici udruženja žrtava genocida počinjenog u Srebrenici 1995. godine, predstavnici Islamske zajednice Bosne i Hercegovine i predstavnici izvršne vlasti Općine Srebrenica.

Član 25.

Članove Savjetodavne grupe predlažu udruženja žrtava genocida počinjenog u Srebrenici 1995. godine, Islamska zajednica Bosne i Hercegovine i izvršna vlast Općine Srebrenica.

Član 26.

(1) Savjetodavna grupa, na zahtjev Upravnog odbora Memorijalnog centra, pomaže Upravnom odboru Memorijalnog centra u izvršavanju njegovih nadležnosti utvrđenih zakonom i ovim statutom.

(2) Članovi Savjetodavne grupe nemaju pravo na naknadu za rad u Savjetodavnoj grupi, osim prava na naknadu dnevnica, ishrane i troškova prijevoza, u vrijeme kada su angažirani na izvršenju poslova Memorijalnog centra, što se uređuje posebnom odlukom Upravnog odbora Memorijalnog centra.

Član 27.

(1) Savjetodavna grupa može svoju organizacionu strukturu i djelovanje bliže urediti svojim internim aktom, poslovníkom o radu.

(2) Odluke koje donosi Savjetodavna grupa nisu obavezujuće za Upravni odbor.

VI. SLUŽBA MEMORIJALNOG CENTRA

Član 28.

(1) U okviru Memorijalnog centra formira se Služba, koja je za svoj rad odgovorna Upravnom odboru Memorijalnog centra.

(2) Služba je odgovorna za funkcioniranje i rad Memorijalnog centra i obavlja sljedeće poslove i zadatke:

a) izrađuje i provodi odluke Upravnog odbora Memorijalnog centra;

b) obavlja finansijske, pravne, administrativne, tehničke i druge organizacione poslove neophodne za rad Memorijalnog centra;

c) obavlja i druge poslove i zadatke koje Službi povjeri Upravni odbor Memorijalnog centra.

Član 29.

- (1) Službom rukovodi Direktor Službe, kojeg imenuje Upravni odbor Memorijalnog centra na mandat od četiri godine.
- (2) Direktor Službe za svoj rad odgovara Upravnom odboru Memorijalnog centra.
- (3) Direktor Službe prisustvuje sjednicama Upravnog odbora Memorijalnog centra bez prava glasa, a ima pravo da iznosi prijedloge i sugestije u vezi s radom i funkcioniranjem Memorijalnog centra i Službe.

Član 30.

- (1) Služba zapošljava potreban broj zaposlenih, u skladu sa Zakonom o radu u institucijama Bosne i Hercegovine ("Službeni glasnik BiH", br. 26/04 i 7/05) i ostalim normativnim aktima Službe.
- (2) Zbog povećanog obima posla, nepogode i sl., Služba može angažirati dodatno osoblje na određeno vrijeme ili za sezonski ili volonterski rad.

Član 31.

- (1) Visina plaće, obaveze i odgovornosti zaposlenih uređuju se pravilnicima Službe, aktom o prijemu u radni odnos i ugovorom o radu koji se zaključuje sa svakim zaposlenim.
- (2) Zaposleni su u radnom odnosu s Memorijalnim centrom.
- (3) Opis poslova i zadataka direktora i ostalih zaposlenih u Službi, način prijema u radni odnos, način prestanka radnog odnosa, te uvjeti za zaposlenje, reguliraju se podzakonskim aktom/aktima Službe.

Član 32.

Služba djeluje u okviru Memorijalnog centra i finansira se iz prihoda Memorijalnog centra.

VII. IZMJENE I DOPUNE STATUTA

Član 33.

- (1) Prijedloge za izmjene i dopune Statuta Memorijalnog centra mogu predložiti:

- a) Vijeće ministara BiH;
- b) Upravni odbor Memorijalnog centra;
- c) Savjetodavna grupa i
- d) direktor Službe.

(2) O izmjenama i dopunama Statuta i drugih općih akata Memorijalnog centra odlučuje Upravni odbor Memorijalnog centra, na način i po postupku koji je propisan Zakonom o Memorijalnom centru Srebrenica - Potočari, Spomen-obilježje i mezarje za žrtve genocida iz 1995. godine ("Službeni glasnik BiH", br. 49/07) i ovim statutom.

VIII. ZAVRŠNE ODREDBE

Član 34.

Statut Memorijalnog centra Srebrenica - Potočari, Spomen-obilježje i mezarje za žrtve genocida iz 1995. godine stupa na snagu danom donošenja, a bit će objavljen u "Službenom glasniku BiH".

Broj UO 03-02-818-11/07
19. februara 2008. godine
Srebrenica

Predsjedavajući
Upravnog odbora
Beriz Belkić, s. r.